

generati secundum quid non rectè deducitur propositio generalis simpliciter. Sic promissiones Evangelii sunt universales ratione omnium credentium, non verò ratione omnium & singulorum hominum. *Matth 11. 28.* Oportet itaque semper spectare subjectam materiam.

XII. *Ex vocatione ad communionem gratiæ non statim colligitur vocatio ad communionem gloriæ.* Nam etiam hypocritis communicatur gratia eximia, sed non salutaris *Hebr. 6. vers. 4. 5.* Itaque à communionem gratiæ, quæ reprobis & electis est communis, non licet argumentari ad communionem gloriæ. Soli electi vocantur ad communionem gratiæ salutaris & gloriæ (quæ duo cohærent individuo nexu) reprobi vocantur ad communionem gratiæ promiscuæ, quæ non cohæret immediatè cum gloriâ. Ex his patet, falsum esse, hypocritas vocari hoc fine, ut salventur. Nihil jam dico de eo, quòd vocationis finis per se sit, ut Evangelium credentibus sit odor vitæ ad vitam; per accidens, ut sit odor mortis ad mortem non credentibus.

